

الحب وصلٌ وإيصالٌ وحلولٌ وتعَبْدٌ وتشبيكٌ وحضنٌ ومناجاةٌ
وتعلُّقٌ وتبتُّلٌ وذوبانٌ وتوسُّدٌ لذراع الحبيب ودخولٌ في كامل تفاصيله،
عزفٌ للسلم الموسيقي على بيانو الجسد، وتلاوةٌ قصيدة الحياة من
كتاب الروح، صلاةٌ صوفيةٌ في ملهى ليلي، مسكة يد ومسكة روح
ونبضة قلب تُجيب نبضة قلب، إيقاع يردُّ على إيقاع، ونَفَسٌ يواكب
نَفَسًا، وومضة تجاوب ومضة، نقطة عرق تتعشق في نقطة عرق لحظة
الملامسة، بركان من اللذة والتنهّد والوجع والارتقاء والألم والنشوة
والندم والجشع وخوف الفراق، اندلاع، فوران، لا إرادة، لا منطق، لا
معقول، لا حسابات، لا موازنات، إحياء، إرواء، نور، برّ، رحمة، طهر،
فُجر، رَأْفَة، انصياع، كدح، تقوى، مكابدة، اتحاد، شغف، تنزّه، صابنة،
لوعة، خشية، طيبة، تضحية، مصافاة، مودّة، وَجْد، وداد، وَكْع، إيثار،
مَنَح، جَوَى، هُيام. إيلاف، صفا... حب.

الحب مش مصباح علاء الدين هيجلٌ لك كل مشاكلك، ولا شريط
ترامادول هينقلك بره الدنيا وينسيك كل مواجعك، ولا ليلة القدر اللي
اتفتحت لك وهتطلب فيها بقى وتتمنى كل اللي كان ناقصك طول
عمرك فيتحقق!

الحب مش هيغيّر فيك حاجة إنت مش عايزها تتغير، أو عامل
نفسك مش واخد بالك منها، أو مش مستعد ليها كفاية، أو استسهلت
وما عملتش الهوم وورك بتاعها!

الحب.. لو متشعلق في قصص قديمة لسه ما انتهتتش، لو مُشوّه
ومنتهك ومخذول وماعندكش القدرة على تحمل المسؤولية، لو ما
بتعرفش تدعم الطرف التاني وتقف في ظهره وتقدر ظروفه، لو أناني
ولعبي ومتسرّع وعشوائي، لو جعان للعلاقات أو بتدور على تعويض أو
بتجرب أو بتسلي وقت فراغك.. مش هيبقى نور بالنسبة لك ولا علاج
ولا وطن، إنما -للأسف- سلاح هتطعن بيه طرف تاني ملوش ذنب،
وهينوبك من الشر جانب طبعا بلا أدنى شك!

الحب مشروع، أهم مشروع إنساني في الواقع، ليه بداية ونقطة
وصول ومعالم وأحداث وخارطة طريق وبروتوكولات وشفرات وليلة
كبيرة سعادتك، وأي إفراط أو تفريط في جزئية من دول، بيفرقع في وشك
فورا ويخلف ندوب ممكن يبقى عمرها أطول من عمرك.

الحب زي الامتحان؛ محتاج مجهود وطاقة، والمفروض تروح له
مذاكر ومحضّر ومستوعب ومستعد للمفاجآت وشبعان وغاسل وشك
وسنانك ونايم كويس ولابس الحتة الزفرة عشان ما تفقدش تركيزك
ولا تتشتت وتعرف تنجو بالدرجات اللي نفسك فيها وتحقق حلمك.

الحب اجتهاد ومثابرة وصبر ويقين وأمل ومودة ورحمة ومداواة
ووصل وإيثار وتجلي وتحلي وتخلي ومشاركة وإخلاص وموامة وإعزاز
وتلطف وتغاضي وشغف وميل ومضافة وهيام وولع وغرام واحتمال
ورؤيا وأناة وتبصر وتجلد وحلم وروية وصلابة وكفاح وتعقل وجنون
ومواساة ومؤازرة وتحنان وتعاطف وصدقة وصدق وتفهم وإنصات
واستيعاب وتمهل ورفق ومهادنة ووفاء.

الحب هو آخر آخر آخر ضمانة في هذا العالم عشان نفضل بني آدمين!



الحب - في جوهره- رحلة استكشافية، يخوض فيها الاتنين مجاهل النفس البشرية حرفياً، ويعرفوا -يقينا لا تخميناً- همّ مين، وهيتمّرفوا ازاى في المواقف المختلفة، وحدود رحمتهم -أو قسوتهم- ببعض إيه.

وبالتالي فردود فعل كثيرة بتبقى مفاجئة وغريبة وغير متوقعة بالمرّة، وأول حد بيتفاجئ بيها هو صاحبها شخصياً، وللسبب نفسه ممكن تجربة الحب التاني تكون أنضج من الأولى، لأننا بنبقى عرفنا شوية أسرار عن نفسنا وطرق إدارة الحب وكيفية التصرف في المواقف الصعبة.

ورغم إن مفيش كتالوج موحد ولا وصفة سحرية الناس كلها تمشي عليها عشان نوّفّر على بعض وجع القلب، ففيه قواعد مهمة لازم نحطها في الاعتبار، أهمها إننا (بشر)، مش ملايكة ولا قديسين ولا أصحاب رسالات سماوية، ما يعني إن هتيجي علينا لحظات نضعف ونخاف ونكذب ونمل ونخون ونشتهي ونغير ونحقد، ومش شرط يكون ده دليل على إقلاعنا عن الحب، ولا إننا ما كناش بنحب أصلاً، ولا إن ما عاdash ينفع نكون مع بعض.

لكنه في الغالب بيبقى مؤشّر إننا محتاجين هدنة، أو استراحة، لإعادة ترتيب الأولويات ورؤية مكاننا الحالي على الخريطة، والتأكيد على محطة الوصول.

والعلاقات الي مشيت سلسة من أول طلعة، وما قابلتش غلطات ولا هتات -على ندرتها- بتبقى هشة للغاية، وأي مشكلة صغيرة تتفجر في وشها وقت الجد، بتبقى مدمرة، لكن الي اتطحنوا وعجنوا وخبزوا بعض، فرصهم في البقاء بتبقى أقوى.

وساعات من فرط الحب، وخوفنا من انتهائه، بنتغاي، ونعمل
بالزبط اللازم عشان نقضي عليه، زي اللي شاف مصيدة منصوبة
قدامه، ومن شدة رعبه جري عليها بدل ما يجري منها، فاتقفلت
على رجله، وكسرتها!

لكن أكبر عدو للحب على الإطلاق: العشم.

إننا نعمل غلطة أو تصرف ما وإحنا متعشّمين إن الطرف الثاني
هيستعوب، وهيعدّي، فنفاجأ إن رصيدنا لم يعد يسمح، وإن الحياة
وقفت تمامًا وتجمدت بشكل مطلق عند النقطة دي، وكل استجابتنا
ومحاولاتنا لعمل كنترول زد والرجوع للحظة السابقة عليها، باءت
بالفشل، وما يقاش فاضل غير إننا نطلع المحفظة ونحاسب على كل
المشارك، اللي طلبناها واللي طلبها غيرنا!

عشان كده، تبقى أهم حاجة في العلاقة على الإطلاق: الرحمة.

رحمة المحب بحبيبه، وقدرته على تفهم أخط ومسامحته ومنحه
فرصة ثانية، والشفقة على حاله واستخسار العمر اللي فات والعمر
اللي جاي وهم مش بعض، لو مفيش إحساس الاستخسار ده، هتبقى
العلاقة مجرد استجابة أنية لشخص قال لنا كلام لطيف، لكن مش
حب، مش مودة ورحمة، مش توحد مع شخص في سبيل الوصول
لهدف مشترك.

الموجع.. رغم إن الحب هو المرادف الأرضي لكلمة جنّة، ومن لم
يدخل جنّة الأرض لم يدخل جنّة السماء، فلو ما كانش ناضج كفاية
وواعي ورحيم، بيبقى بوابة التيه الأبدية، واللي بيدخلها ما بيخرجش
منها سوي تاني أبداً!



الباعين عندهم مصطلح مشهور اسمه زبون (طيّاري). يعني اللي بيبقى معدي بالصدفة فيبشترى منه مرة واحدة ومش هيشوفه تاني، فييدي له أسوأ بضاعة، من فوق بتبرق ومن تحت زبالة حرفياً، لأنه مش فارق معاه وما بيمثلوش عامل تغذية مستدامة.

أما الزبون الدائم فليه معاملة خاصة ومخلفة تليق بقدرته على أخذ حقه وبستفة البيع لو حس إن المعاملة مش تمام.

وده نفس اللي بيحصل في العلاقات بالظبط!

فيه ناس بتعتبرك حبيب طياري، واخدين قرار إنك مش مكمل في حياتهم، إنت بتاع وقتك ومرحلتك هتنفذ غاية في دماغهم وهتتكلم على الله، فييقضوا معاك وقت لطيف بدون مستقبل، ممكن يزعلك عادي ويهينك عادي ويجي عليك ويخذلك ويعرضك لكل صنوف الإساءة الممكنة بضمير مستريح.

أما لو إنت فارق معاه، وبيخطط لمستقبله وياك فعلاً، فالمعاملة هتختلف 180 درجة!

وإحنا بنبقى عارفين على فكرة إذا كنا طياري في حياتهم ولا لأ، بس بنختار نتجاهل ده.. يمكن!

بنختار نتعلق بحبال دايبية، ونلتمس أعذار مش موجودة، لأن حياتنا فارغة وموحشة ومحتاجين نحب ونتحب، محتاجين صدى لصوتنا اللي اتبجح من كتر النداء على اللي سابونا لوحدها ومشيو!

لكن الدرس اللي هتتعلمه بتمن غالي قوي في النهاية: إن القلب مش بعزقة! القلب مش بعزقة يا شقيق.



مفيش كتالوج للمشاعر الإنسانية، ولا قاعدة واحدة تنطبق على جميع البشر.

والحب تجربة شديدة الذاتية والخصوصية، وحتى لو تشابهت الخطوط العريضة للحكايات هتفضل فيه تفاصيل لا يدركها إلا من يكابدها، فما تستوردش خبرات حد ولا تحاول تطبق ظروفه عليك. لكن -بصفة عامة- عشان تعرف إذا كنت ماشي صح ولا غلط، شوف إنت مبسوط في العلاقة دي ولا لأ. إحنا بنحب عشان ننسب ونفرح ونتكامل، بنحب عشان رؤيتنا ل بكره تتسع وإحساسنا بالجمال يزيد وثقتنا في نفسنا ترتفع، فلو العلاقة بتخضم من رصيد أي مُعامل من دول، يبقى فيه حاجة غلط، ولازم وقفة.

ومش شرط عشان بدأت تكمل لمجرد الإكمال، لما تنفصل بعد ٢٠% من المشوار أفضل من لو انفصلت بعد ٩٠%. قلبك مش معمل كيميا، ترگب ده على ده يمكن يطلع شغال!

قلبك سلاحك الوحيد في معركة الحياة غير العادلة، وليه طاقة شحن زيه زي أي مُعدّة، فما تخسروش بدري، أو تديه للي بيسحب من الباور بتاعته، عشان تفضل قادر تحس، وعشان تفضل قادر تبقى بني آدم.



أسوأ ما في كلمات الحب، إنه بعد انتهاء العلاقة بتبقى أكثر حاجة هتجننك: هو الكلام ده كان حقيقي فعلا وقتها والحال اتبدّل، ولا كان كذب وشربته؟!

الكلام اللي سهرت الليل تفكر فيه، وكتبت بعضه على نوتس الموبايل بالساعة والتاريخ وعشان ما تنساهوش تحت أي ظرف، وحكيت لصحابك عنه، ورددته بالساعات بينك وبين نفسك وإنه بتتنهد ومآمن لبي جاي على الآخر!!

إذا كان كذب، ازاي كان واصل ولا مس ومخترق وبيطبطب كده؟!

وإذا كان حقيقي، فازاي انتهى النهاية الباردة دي؟!

الكلمات، عمرها أطول من اللي قايلها، فلو مش ناويين تكملوا، ما تتكلموش أرجوكم، ما تزودوش الأسلحة اللي بتطعننا بعد ما بتمشوا، ولا الأشباح اللي بتعشش في دماغنا وتنغص علينا كل ثانية بعدكم، ولا الساعات اللي بنقع فيها تحت رحمة أسئلة ملهاش إجابات..

وإذا أحببتكم -يوما- فأحسنوا الذبح!



فيه نوع من البشر، لأنه مُهتم جداً، ويحبّ بكل ذرة في قلبه، ويباخذ آلام الآخرين على صدره بلا دعوة من أحد، ومستعد -حقيقي- يبذل دون مقابل لآخر نقطة -لسبب ما- ما يجذبش غير الأشخاص المتنمرين والمؤذيين ومصاصي الطاقة، وبيتوزط معاهم في علاقات مريضة جداً ومجحفة ليه على كل المستويات؛ كل ما يزداد في العطاء يزدادوا في القسوة عليه واستغلاله، كل ما يفتح مساحات للتلاقي، يفرّغوا 100 وسيلة للفرقة.

ومشكلته الأساسية إنه ما بيقاش مصدق إن الطرف التاني وحش كده فعلا، وبيدّمّره بالبطيء، فيفضل يبص حواليه بحثا عن أي تفسير لبي بيحصل، غير إنه يحمله المسؤولية الكاملة ويقننح إنه أساء

الاختيار زي كل مرة، أو بيتصوّر إنه أقل من الطرف الثاني وكونه فاز بيه فدي نعمة تستوجب الشكر وتحمل أي شيء للحفاظ عليها!

لكن طال الوقت أم قصر هتيجي لحظة يلاقي نفسه -حرفيا- في الطل: أدّى الي اداه، ورصيده حفنة من الوجع، أخلص وتفاني، وآخرته كانت مما يليق بالسفاحين وقاتلين القتلى!

والكلاسيكيات بتقول إن القفلة دايمًا بتيجي من عند المتنمر، الي قضى وطره خلاص وشبع استغلال وممل، وآن الأوان ينقل العطا على ضحية تانية، فيحط كلمة النهاية بأكبر قدر ممكن من الوحشية والجرّوت، كأنّ مش هاین عليه يسبب فيك ذرّة سليمة، أو حاجة حلوة تفتكرها، ومحتاج يتطمّن إن مش هتقوم لك قومة بعده!

ولو الشخص/الضحية -في لحظة تنوير- أدرك قدرته الفطرية على تدوير الآلام، وإعادة إنتاجها على هيئة دوافع للإفلات من المحنة وتذوق الحياة الي بجد ورسم خريطة طريق على مقاسه، هيقف على رجليه في يوم من الأيام، ويشوف نفسه -على ضوء المحنة- بمنظور جديد يستحقه.

لكن لو ما اتعلّمش الدرس، وفضل يستنسخ التجربة نفسها مع أشخاص آخرين، فهيعيش مستباح للأبد، باب خراب، ممسحة كل من هب ودب يمسخ رجليه فيها ويرميها ورا ظهره في النهاية!

أنا عارف طبعًا إن التغيير صعب، والتعافي من إدمان العلاقات مش سهل، والتعود أشد تأثيرًا من الحب، بس فعليًا كل واحد عنده فرصة للاختيار، وتعديل مساراته، والبدء من جديد في أي نقطة من عمره -أيا كان الي هيخسره!- وجزء كبير من التعافي في تقبلنا لنفسنا ولأخطائنا وسقطاتنا وضعفنا وحبنا ليها وإيماننا إننا نستحق الأفضل،

لكن الاستمرار في تلقى الأذى وتبريره -وأحيانا الاستمتاع بيه لا شعوريا!- مش هيوديك في أي حته. وأكيد أكيد أكيد 3- أكيد- فيه مخرج في حته ما، يمكن لما ترکز تشوفه، لما تبذل بعض الجهد بنية صادقة توصل له، لما تطلب مساعدة من متخصص أو حد تثق فيه ينور لك اللي كان غايب عنك.

بس لازم الأول تدرك حجم الخراب الحادث في روحك، حجم الظلم اللي بتظلمه لعمرك، حجم الفرص اللي بتفوتها على نفسك، وتاخذ القرار، وتتعب شوية معلش عشان تنقذه، لأنك لما تدخل في علاقة سوية ومتكافئة بعد كده، وتشوف النعيم اللي ممكن تعيشه، والفرج والبراح اللي هيتضاف لرصيدك، والمحبة اللي ممكن تقابل بيها العالم، هتزعل من نفسك قوي قوي قوي على اللي عملته فيها زمان، وهتندم إنك ما قدرتش نفسك حق قدرها من بدري!



ليه بنخاف من الحب؟

لأن ليه فاتورة، وغالبًا مش بسيطة، والبشر أغلبهم يميل للأخذ دون محاسبة على المشارك.

كمان نسبة الخداع وعدم اليقين والخذلان والتخلي بقت مروعة في العلاقات، فالناس بتكش، لأنها على شعرة ومش ناقصة!

وضيف لده: عدم النضج العاطفي. يعني الناس عايزة تحب بس مش عارفة يعني إيه حب، أو عارفة عنه إنه تسبيل ومسكة إيد وورد وعشا رومانسي لكن ما تعرفش إن ليه جانب تاني، اسمه المسؤولية والتحمل والتضحية والإيثار والكفاح والتغاضي ليدوم الوداد!

فبعد ما حلاوة البدايات تخلص، ونيجي للجد، بيتخضّوا، ويبلّغوا
فرار!

الحب شعلة، لو عرفنا ازاى نملكها صح هنتور لنا الطريق، ولو ما
عرفناش، هتتحرق أرواحنا للأبد!



الانبطاح في العلاقة مع الآخر وفرط تدليله وكشف كل أوراقك
قصاده بدعوى الحب، بيوصل له رسايل سلبية كتيرة وعكس مرادك
طول الوقت، زي إنك ما تقدرش تستغنى عنه.. فيترجمها بإمكانية
الإساءة ليك دون توقّع رد منك أو معاتبة!

وإنه بقى مصدر سعادتك الوحيد.. فيتمنّع عليك ويقرب ويبعد
دون منطق، عشان يساومك على أوقات البهجة!

وإنك بتثق فيه.. فيلعب بديله دون انتظار عقاب أو تخيل وجود
محاسبة!

وإن الحفاظ عليه في قلبك مسألة حياة أو موت، فيكفّ عن العطاء
ويكتفي بالسلب فقط!

وإنك مؤمن بيه.. فيتصرف بعجرفة وياخذ القرارات دون تبريرها
أو مراعاة مصلحتك فيها، أو حتى وضعك في الصورة وشرح الأمور ليك.
وإنك اختزلت كل العالم فيه.. فيطاول فيك العزّال والكارهين
والمأجورين، ويقدمّ مصلحة كل الناس عليك!

وإنك عايش عشانه بس.. فينسى إنك بشر، ليك سلبياتك
وإيجابياتك، ويحبسك في إطار حديد من التصورات والتوقعات الخاصة

بیه هو، ولو اتصرفت عکس تخیلہ، أو ارتکبت نفس الأخطاء الی هو یرتکبها عادی، یتجنن ویثور ویقول إنک اتغیرت، وما یغفرلکش ولا یسامحک أبدا!

وبعد شویة نرف والکتیر جدا من "لا مش ممکن، هو أکید بیحبني، بس أنا الی فاهم غلط"، و"أکید عنده ظروف" و"أکید عمري ما ههون علیه"، یتحوّل الأمر -بوضوح- لواحد بیدي بس، والتانی بیأخذ بس، واحد بیراعی ویصون ویتحری ویحسّس علی کلمة خوف الزلزل، والتانی قطر مندفع نحو رغباته بلا محطة وصول، واحد بیقیم بساتین للبهجة والتحقق، والتانی بیقطف کل الزهور ویصطاد کل الفراشات ویضرب کل للمبات النیون بالنبله!

وبعد ما كانت العلاقة مُنشَط عام للدورة الدمویة وفیتامین (أ) و(ب) و(د)، وما یستجدّ من فیتامینات، بتتحول لفأس بیهدم جدار روحک کل یوم، ویلتهم حبة قلبک، ویسحب رصیدک -الواهی أصلا!- من المقاومة، ویسییک أعزل تمامًا ومخذول للأعماق أمام قُطاع الطرق ولصوص المشاعر وبلطجیة الأحاسیس!

بس التاریخ بیقول إیه؟

إن الواهب المعطاء حی، وإن کان میّت دلوقتی وسجین وجعه وخذلانه وعمره الی أراقه علی عتبات مَنْ لا یستحق، والسالب الناهب میّت، وإن کان مفعم بالحیة دلوقتی ومش حاسس بجریمته وییخطط لارتکاب المزید، لأن الواهب عاش فعلا واختبر وعاین واقترَب وتعثّم ورأى وطالع بعین الله، بعین الحب، فیما السالب کان بیأدی ویمثّل ویبالغ من غیر ما یعیش بجد ویدخل الحضرة ویغشى قلبه النور الحق!

والتاريخ برضه بيقول إن الدنيا دَوَّارة، وسريعة التقلب والتغيير حد
الفجيعة، وكل اللي مرينا بيه يُوشك إنه يرجع تاني من زاوية تانية
وشكل تاني ومع بشر تانيين، فَمَنْ ظلم وتجبر وخَذل وأوجع وابتلى،
سيشرب من الكأس نفسها ولو بعد حين، ومن سلّم وأناب وراعى
وأحسن واتفى ووفَّى، فإن له الرضا حتى يرضى.



فيه علاقات بيبقى الطرفين فيها نفسهم يرجعوا، عرفوا إن حياتهم
مع بعض أيا كانت مشاكلها أهون بكتير من الفراق وإن كل واحد
يحارب على جبهة لوحده. وأدركوا إن براح الفرص التانية سلم خلفي
للفرار من مصير ينز وحدة ووجع وتأنيب ضمير!

لكن في اللحظة النورانية دي، فيه عفاريت كتير بتقف في سكتهم:
كبرياء زائفة على خوف من تكرار الفشل على الناس هيقولوا إيه على
هو اللي غلطان، وصولاً لـ "قَدَّر الله وما شاء فعل!"

لكن الله لا يفرض علينا شيئاً، سبق علمه بنتيجة تصرفاتنا لا يعني
موافقته أو دعمه للخطأ، ومحاولة التمسح بيه في كل قرار غير موفِّق
بناخده، مش هتعفينا من مواجهة نتيجة تصرفاتنا الغلط في النهاية،
ولوحدنا تماماً!

مرّة صديق كان بيفضض لي، ويحط إيدي على وجيعته: "أنا مرّة
عَيَّطت وأنا ماسك إيدها، مش لأي حاجة، غير لأني حسيت إني بحبّها
قوي، ومش عارف أعبر عن ده غير بالدموع!"

الصديق ده ساب البنـت الي حبها عمر كامل، لأسباب يطول شرحها، ولما خـد قرار الرجوع بعد ما بقاش قادر فعلا ولا هي قادرة، كان كل شيء فات، وخسارته كانت أبدية.

ولحد النهارده بيتفرج على الحياة مش بيعيشها. وساعات يكلمني في التليفون ويسيب الخط مفتوح ما بينا من غير ما ينطق بكلمة، لمجرد إنه كان بيحكي لي عنها، فبقيت -بشكل أو بآخر- من ريحة الحبايب الي ما عاـدش طايلهم!

فيه خسارات مهما كابرنـا ونجحنـا وخطينـا.. ما بتتعوّضش، ومشاعر مهما اخترنـا وتحايلنـا واجترأنـا.. ما بتتكررش، وقصص مهما جرّبنـا وغامرنا وطوّحنـا إيدينـا ورجلينـا.. مش موجود منها غير نسخة واحدة بس، لكن لما عشناها كُنّا أغبي من إننا نعرف ده، ونعض عليها بالنواجذ.

وكلنا -في مرحلة ما وحكاية ما- أغبيا!



الحب حلو، لما ينتهي إلى اللقاء والقرب والمودة والرحمة والإيثـار واحترام الوعود وصيانة الأمانة، ولعين لما يبقى مجرد تجربة، مرحلة، مساحة نشم نفسنا فيها قبل ما نكتم نفس الطرف الثاني!

كل الهزائم قابلة للترميم، كل الفراغات قابلة للملء، إلا ما يفعله الغدر بالقلب، وما تُمليه الهزيمة والبعثة على حبة الروح.

فما تعشّموش حد بما لا تملكون، وما تستهونوش بطعنات تقودها يدٌ كانت حبيبة -ذات يوم- إلى سويداء القلب.



سلامًا لمن تغاضى ليدوم الوصال،
وتخلّى لتستمر المحبة.



الحب - (المشاعر وليس الأفعال) - مش بالزراير والله، يعني أنا مش بشوف ظروف الي قدامي الأول مناسبة ليا من كل النواحي وهتمثل صفقة رابحة، فأقوم ضاغط على الزرار الي على إيدي الشمال ده فأحبه!

أو ألقى فيه عيبين ثلاثة ما يأكلوش عيش، فأقوم موقف البروسينج، وناقل العطا على غيره!

عشان كده ممكن تلاقي واحدة بتحب حد قد أبوها، وواحد متجوز ويحب واحدة تانية، وواحدة مخطوبة ومتعلقة بحد تاني، ومش شرط النماذج دي تبقى بنت وسخة على فكرة، يعني ولا ليها أنياب ودائرة على حل شعرها تخرب البيوت الآمنة المستقرة، لأن ده -مرة تانية- غصب عنهم، مش بإرادتهم، دي حاجة ربنا ابتلاهم بيها. ولو بصيت ملامحهم كويس هتأكد إنهم مش من عالم تاني، بالعكس دي أختك وزميلتك وصاحبك الي على أول الشارع ويمكن أبوك!

آه ساعات بيبقى فيه ظلم لأطراف تانية، وفيه سياقات إنسانية لازم تتراعى، وحسابات لازم تتعمل، لكن الواقع مش دايما عادل وإنساني ومثالي، لأنه واقع.

ورفضنا للشيء لتلافي أضراره، لا يعني بالضرورة عدم وقوعه، أعتقد
إننا تجاوزنا مرحلة إننا نغمض عينا فتختفي مشاكلنا كلها، فنضحك في
انتصار وزهو، إلا لو قررنا نكمل حياتنا كلها عميان بعد كده!

وصحيح يمكن جسديا طرّفا المحنة يقدرنا يبعدوا ويهربوا، لكن
قلبيما بيظلموا أسرى وعبيد ودرؤايش للمشاعر، بيتآكلوا داخليا وهم
بيتفرجوا على الحياة مش بيعيشوها، لحد ما يقابلوا وجه رب كريم!
لكن فعليا ما حدش عارف ظروف حد، و(لا أحد غيري يعرف أن
حدائي يؤلمني) زي ما بيقولوا، فزحم الناس، وما نضبش ونوجع ونعلم،
لأن اللي فينا -كلنا- مكفيننا عمومًا، ومفيش كلام بيغيّر، وما حدش
عارف ربنا مخبي لنا إيه بكره!

وكونك معافي في قلبك واختياراتك حتى اللحظة، لا يعني إن اختبارك
انتهى، بالعكس، ده على وشك البدء في أي لحظة دلوقتي، فخلي بالك
كويس، لأن حُكمك على غيرك دلوقتي هيكون الدرجة اللي هتاخذها
في الموقف نفسه بعد شوية.

يعني إنت اللي بتعلم امتحانك بعدين.. بس دلوقتي.

فاحذرا!



وإذا امتلأ الفراغ الذي تركه محبوبك بسواه، فتأكد أنه لم يكن
يناسبه منذ البداية، وأنت أنت الذي منحتة حجمًا أكبر من حجمه!



لو الطرف الأول صرّح للطرف الثاني بحبه، والطرف الثاني ده ما كانش ببيادله الشعور نفسه، فغالبا هو صدّر مشاعر ما، أو أبدى استجابة معينة، أدّت الطرف الأول مبرر وعشّمته لدرجة إنه يتجاسر ويعمل كده، وهو متوقع بنسبة كبيرة إن الرد يكون في صالحه.

وارد طبعا يكون الطرف الأول موهوم لوحده، وعلى تكة، بس أغلب القصص اللي عاصرتها، كان الطرف الثاني مشارك في الإثم بطريقة أو بأخرى، بيتسلى بقى، بيجرّب، بيقضّي وقت فراغه، بيعوّض اللي اتعمل فيه، مستخسر ما ينتهز الفرصة، المهم إنه مشترك في جريمة سحل بني آدم كل ذنبه إنه حب.

فيه ناس بتفوق في المرحلة دي وتبطل لعب، وناس بتكّمّل شوية، وأوسخهم اللي ببيكّمّل بلا وعود ولا إعطاء نفسه حتى فرصة للتفكير، يعني يكتفي ازاء كلمات الحب والوله وانسحاق المحب بابتسامة محايدة وكلام مايع ما يتمسكش، عشان وقت الجد، وبعد ما يلعب كل الألعاب، وينحت القلب اللي حبه تماما، ويسيبه على الطوب الأحمر، يرفع قدام ضميره يافطة: والنعمة ما أنا دي أؤختشي منى!

لكن، وهو يعمل حساباته العظيمة دي، ويخرج بلا خسائر، من وجهة نظره، بينسى إن تأخر دفع التمن لا يعني الإفلات بالبضاعة بلا مقابل، بينسى دورة الزمن وعبر التاريخ، وبينسى إن القلب اتسمى كده من سرعة القلب والتبدل والتحول، وإنه مش ملك حد، لكنه بين أصبعين من أصابع الرحمن يقلبه كما يشاء.

إحنا في منتهى الهشاشة والله، نفسيا وجسديا، فمنين بنجيب الجرأة واليقين المفطرد ده وإحنا بندبح وبنهيل التراب!

وازاي بنآمن كده وبنقدر نكمّل حياتنا وجثث القلوب مرمية ورا
ضهورنا!

ويا ترى لما بتترد لنا الضربة بنعرف ده ذنب مين، ولا كتر ضحايانا
ما بيسمحلناش نفتكر؟!



ويتعلّق العاشق بالمعشوق، ولو قسا وهجر وأساء، لأنه يتعالى
على اللحظة الآنية، طامعًا فيما يعقب الصفاء، ويلى المكاشفة، من
حلاوة الوصل، ولدّة القرب، وغنج العتاب، فإذا الوقت الصعب مطيّة
للمباهج، والهجر العابر سلّم لوصل أكثر ديمومة.



أكبر حاجة تخليك تنجح في جوازك: إنك وإنّت داخل دنيا تبقى
مقتنع بالطلاق!

معنى إنك تبقى عارف إن لو ما حصلش توافق، أو بشن الطلاق
متاح، لأن إحنا ملناش إلا حياة واحدة ومش هنجامل فيها الناس ولا
هنصرفها بقشيش على حد!

الجواز يعني سكن ومودة ورحمة ودفا وإيلاف وسعادة ومنتعة
وراحة نفسية، فإن كان على النقيض من كل ده، يبقى إيه فايدته؟
صحيح القرار مش سهل، ومفيش حاجة بترجع زي الأول، وساعات
فاتورته بتبقى ثقيلة جدا، لكن في أحيان كثيرة، الحياة الحقيقية -فعلا-
بتبدأ بعد الطلاق.

لأنك بتبقى خدت خبرة كافية تمامًا لإنك تحسن الاختيار المرة الجاية، واكتسبت قدر من المرونة يخليك أقوى وأكثر قدرة على الحكم على الأشياء.

يعني كل اللي عنده مشاكل مع مراته يتطلق؟

لا طبعاً، مفيش حياة خالية من المشاكل، ولازم تحاول مرة وألف تصلح، وتتعلم تفرّق بين الحالات العارضة والحال الدائم، لحد ما تتأكد تماماً إنك وصلت لحيطه سد. ساعتها اقعّدوا مع بعض، وبكل احترام حدّدوا الخطوة الجاية سوا.

التعاسة -زيّها زي السعادة- قرار.



رغم اختلاف أسباب فشل العلاقات عموماً، فغالبا يبقى فيه قاسم مشترك أكبر بينها، هو بلا منازع: الغباء.

غباء الرغبة في الحيازة والنوال قبل الأوان، غباء الاستسلام للظروف والخوف من بُكره.

غباء عدم اليقين والتأرجح والعشم في فرص تانية مش هتيجي أبداً!

كل يوم الإنسان بيثبت إنه لا يستحق هبة السعادة، هو جيد فقط في الشقاء واجتلاب المحنة كمغناطيس، ولما بيلاقى تنتوفة سعادة جاية له في الطريق، بيجري بالمشوار عشان يبوظ كل حاجة!

من زمان -وبشكل شخصي- فقدت إيماني بالبشر، وحُسن إدارتهم لمواردهم: القلب والعقل، وكل تجربة أقول مش هندهش، مش هتخض، لكن عبقرية الخذلان وعظمة التخلي كل مرة بتهزّني،

وتخوَّفني، وتفكّرني بكل أشبّاحي وعفاريّتي، وإن كانت بتفسّر لي ليه الحجر والجبال والجمادات رفضوا خلافة الأرض، والإنسان اتشمل وقال أنا أشيل: لأنه غبي، وما بيعرفش يقدر إمكاناته في مواجهة الأشياء والظروف، لكن المصيبة إنه مش عارف ده، ومتصوّر إنه قادر يعمل كل حاجة في وقت واحد: يحب ويجرح ويسيب ويرجع ويخذل تاني ويفارق ويلعب ويتنطط ويعرف وينكر ويرجع تالت وعاشر ومليون، وكل مرة هيبقى قادر يصلح كل حاجة، ويدير دفة الأمور لصالحه، كل مرة هيبهر ويداوي ويلعب بالتلات ورقات ويلغي الطرف التاني ويحقق الي هو بس شايفه، لكنه بيكتشف -بالطريقة الأصعب على الإطلاق- إنه واهم، وأهبل، وإن الي راح مش بيرجع، ولو رجع عمره ما بيكون بنفس بهاءه الأول وعفويته.

لكن ما حدش بيتعلّم، ما حدش بيحس بوجع غيره، وكلنا لما بتجلنا لنا الفرصة بنجرح ونخون ونغزل ضفيرة جديدة في سجادة الألم الكونية المهولة.. كلنا بلا استثناء.



هتفضل تتحمل منه حاجات كثير وصعبة وتفوق طاقة البشر، وكل الي حوالياك مستغربين من قدراتك الخارقة، وبيلوموك وهم بيضربوا كف على كف، وإن بتبتسم في قلة حيلة، لحد ما تيجي تفصيلة تافهة وعبيطة وأقل من إنها تذكر، فتنفجر، وتهد العلاقة على راسك وراسه، بلا لحظة تردد واحدة!

إنّ مش ضعيف، لكن اتحملت أكثر مما ينبغي بالفعل، استهلكت الشمعة من الطرفين، زقيت العلاقة بالتغاضي والمعلش، لحد ما بقيتش قادر تطنّش أكثر من كده، وما تنصاعش للعلامات.

ومع إن كان ممكن تكمل -زي ما عملت قبل كده كثير- وتزوق تاني لقدام، لكن روحك فضيت، ومفيش مصدر، ولا حتى هو، يقدر يشحنها تاني، والمفاضلة دلوقتي ما بقيتش بين حياة فيها حب وحياة مافهاش، لكن بين حياة ولا حياة!

ارحموا حبايبكم من الوصول لمرحلة حرق المركب والبحر والسّمك والشط، عشان يقدرُوا ياخدوا نفسهم، وينقذوا قلوبهم -على آخر لحظة- من قزمة الصقيح!



الصدام بيقع لما يبقى فيه طرف عايز علاقة عابرة ذات منافع معينة ومحددة سلفا بصرف النظر عن رغبات الطرف التاني واستعداده وملاءمة المطلوب مع خطته العامة للحياة، في الوقت اللي الطرف التاني بيبحث عن استقرار وهوية ويمكن شكل اجتماعي معين وإشباعات محددة.

ولو الطرفين ما كانوش واضحين مع بعض من الأول بما فيه الكفاية لمعرفة خارطة طريق كل واحد ونواياه، يقنوا بيضيعوا وقتهم ويبسحلوا بعض ويبخضموا من رصيد استقرارهم النفسي كثير قوي لحد ما -عاجلا أم آجلا- الورق بيتكشف، وكل واحد بيتحط قدام حقيقة الآخر وبتقع الصدمة!

وفي مستوى آخر من الغباء بعضهم بيعاند ويقرر يكمل على أمل زائف إنه هيقدر يغير وليفه، وطبعاً ده ما بيحصلش، فتقع الطعنة الثانية اللي بتدمر مزيد من رصيد السلام النفسي وتحمل الحياة لدى صاحبها!

والتجربة والتاريخ والجغرافيا كمان والله بيقولوا إننا ممكن نوفر وقت كبير قوي لو حطينا ورقة على صدرنا في بدء العلاقة فيها طلباتنا بوضوح وصدق: أنا عايز حب بلا التزام، عايزة عريس، عايز أعط، عايزة أبقى أم، عايز أصحاب، عايزة حب، عايز أكوّن أسرة، عايزة أتفسح وأسهر، عايز... عايزة...

لكن -غالبا- إحنا عايشين بس عشان نكرر أخطاء الآخرين بدل المرة ألف، ومصممين كل مرة نتصدم إنها أسفرت عن نتائج مختلفة!



الاحتياج بيقوي الوهم، ويخلينا نقلّب في دفاترنا القديمة، ونضفي صفات مش حقيقية على اللي فاتونا، لدرجة إننا ممكن ننسى مصاييهم، ونلبّسهم جناحات، ونتمادى فنتصوّر إننا اللي أسأنا ليهم واتسببنا في الفراق!



لا دية لمن ألقى بقلبه على نصل ذابحه، ولا تعزية لمن حمل كفته بين يديه ليسترضي قاتله!



معظم النار من مستصغر (العشم)!



مشكلتنا الحقيقية مع اللي بنسلمهم قلوبنا
إننا ما بنقدرش نشوفهم على حقيقتهم:
أشرار وأصحاب منفعة!

عشان كده جَلّ وقتنا معاهم بنقضيّه في محاولة التماس الأعذار
ليهم، وإيجاد أي مخرج لإساءتهم وتجبرهم علينا وعدم معاملتنا بما
نستحق أو -على الأقل- زي ما بنعاملهم!

يمكن عشان ما نعترفش إننا بالسذاجة دي، ولا بغفلة القلب
والحماقة اللي تخلينا كل مرة ناخذ نفس الضربة، يمكن عشان ما
نضطرش نغيّر شيء اتعودنا عليه وبقى مغرور في تفاصيل حياتنا ونبداً
كل حاجة من الأول، أو نرجع تاني لوحدتنا وغربتنا، يمكن عشان لسه
عندنا أمل تحصل المعجزة ويحسّوا بينا ويفوقوا ويلحقونا قبل ما
نضيع من بين أيديهم، يمكن لأننا بنحبهم فعلا رغم عيوبهم مش
عشان مميزاتهم!

لكن في النهاية، مهما عافرنا وضحينا وهربنا وكابرنا: طاقتنا بتخلص،
وأرواحنا بتبقى مخلّعة، وبتضيق الدنيا علينا بما رحبت، وبنلاقي
نفسنا برضه واقفين قدام السؤال الجارح نفسه: هو إحنا ليه بنعمل
في نفسنا كده؟ وإذا كنا هُنا عليهم ورخصنا في نظرهم للدرجة دي،
فليه نهون على نفسنا؟!



عبارة الست اللي بتقول: "دا الصبر عايز صبر لوحده"، بتلخص
المأزق الوجودي اللي العاشق بيجد نفسه فيه فجأة، لما تحصل بينه
وبين محبوبه حاجة، ويبقى حلها الوحيد في الصبر، وانتظار ما تأتي به
الأيام، فحتّى لو وافق نظرياً على الانتظار، ومن ورا قلبه، وبحكم إنه
لا يملك الرفض، السؤال الملحّ هيبقى: هيعمل ده ازاي؟!

منين هيجيب الطاقة اللي تخليه يراقب تغيّر الحال، وزوال ما تعود
عليه، وتحوّل النعمة لنقمة، وهو مكتوف اليد، ومش قادر يعمل أي

حاجة؟! وازاي هيقدر يزقّ الثواني والدقائق والساعات والأيام، عشان يوصل للحظة المرتقبة، سواء هيصدر فيها حكم بالإعدام أو البراءة؟! بأي وسيلة يقدر يوقّف نبضات قلبه إذا صاحت، وهفّفان روحه إذا اشتعل، وتوق نفسه لسابق العهد مع المحبوب إذا تأجج؟!!

ازاي هيقدر يحارب سيل الذكريات والصور والعبارات والمواقف اللي هتتسلّط على حبة قلبه -مثل لهب صهر المعادن!- وتفضل طول الوقت ترسم له مشهدين، واحد ألوان وهم بيتكلموا لآخر مرة مع بعض زي عاداتهم، ويبضحكوا، وينكّتوا، دون معرفة بما تخبئه اللحظات التالية، والثاني أبيض وأسود، مش باين فيه غير ظهر كل واحد فيهم وهو بيمشي في اتجاه معاكس للتاني!

فيما إنه واقعيًا، كل الطرق لممارسة فضيلة الصبر، بتثبت فشلها الفادح في النهاية، أو بتنجح أول يومين ثلاثة، بفعل حلوة الروح، وبعدين تفرقع في وش صاحبها، أو تصيبه بحالة عكسية من البلادة، فتغيّر جيناته للأبد، فيصعب عليه استعادة نفسه ثانية، حتى لو تغيّر الحال لعين مطلوبه!

فلا تُطيلوا عذاب محبيكم، ساعدوهم على برّكم، وقصّروا أيام الغياب، وفرّجوا كربات انتظارهم، وسكّرات خوفهم، ولا تُقنطوهم من رحمة الله.



كانت هناك أيام، أستيقظ فيها من تلقاء نفسي مبكرا جدا، دون منبه لحوح، ولا اتصال من صديق، كنت سعيدا وأريد أن أقابل العالم، وأردش معه قليلا ونحن نشرب شايًا بالنعناع ونستمع لمزيكا رائقة،

قبل أن أرتدي أفضل ما عندي وأهرع لقطف ابتسامة صباحية من
جنة حُسنِكَ!

أيامٌ مجيدةٌ كنت خلالها قادرا على فعل كل الأشياء التي أعجز
عنها الآن، ومقابلة كل البشر الذين أتهرب منهم الآن، والوفاء بكل
(الديد لاينز) التي ستجري ورائي -حتما- يوم القيامة!

كانت هناك أيام، كنت فيها -فعلا- أفضل، وأقوى، وأحدَّ بصرا
وبصيرة!

كانت هناك أيام...

كانت...



كثير بتكمّل في تجربة، عشان مش عارف لو خلصتُ فعلا هتعمل
إيه!

طول الوقت بتتخيّل الفراغ المرعب اللي هتبقى فيه بعدها، وعدم
وجود أي خط تاني في حياتك تمشي عليه، فتفضل واقف مكانك،
ومتبّت في الحالة، مستني المعجزة، وأحيانا مش مستني ولا حاجة،
واقف وخلص!

الانشغال -من وجهة نظرنا في الوقت ده- حتى لو بلا هدف ولا
نتيجة مستقبلية، بيبقى أحسن من الفراغ والموت التام ساعات!



من أراذك حقًا.. نالك.



اللهم لا تكل أمر قلوبنا لمن لا نهمهم، ولا تسلّم مفاتيح أرواحنا لمن لا يعتبروننا أهلا للمحبة، ولا تشعل فينا شغفا لن يروى، وعشقا لن يكتمل، وأملا لن يقف على قدميه، وفرحا تتجاوز شهادة وفاته مع شهادة ميلاده.



واعلم -أعزك الله- أن جرح الحب إذا لم يُغلق على نظافة، بُعث مرةً أخرى على رأس كل فجيعة، وبين يدي كل محنة، فأسال دما حسبته جف، وأوجع قلبا ظننته تسلى، وأحرق مهجة خلتها برئت واستقامت لها الحال. فلا تبخل على نفسك بنهايات ناصعة البياض، وتخرج لطيف العبارة رشيق الإشارة، فلعل الدنيا تدور، والحظ يدور، والنصيب يدور، وتلتقي الوجوه ثانية، في ظروف أكثر رحمة، ومساحات أكثر قربا، فتصل ما انفصل، وتخيظ ما انقطع، وتجبر كسر ما انفطر، وتستأنف حياتك تماما من النقطة التي متَّ شوقا، ودعوت ربك سرا وجهرا وليلا ونهارا، أن تُحلّق منها.



خد القرار اليي تقدر تبصّ في وشه وإنّ قاعد لوحّدك آخر الليل، مجردا من الحول والقوة والعزوة والصاحب والولد، وما تحسش بقبضة باردة بتعصر قلبك.



بعد خروجك من العلاقة، بتشوف كل حاجة بشكل تاني: ريحة الهوا والناس والطرق والعربيات والإفيهات وتاسكات الشغل والمزيكا والأكل ويوم الأجازة!

شيء أكبر من إنك تشاور عليه اتغيّر جوّك للأبد، وخلقى العالم كله كأنه جديد عليك، أو إنت اللي جديد عليه، ماتت الذاكرة المشتركة ما بينكم، وأصبحت محتاج -زي الطفل اللي بيتعلم المشي- حد يسندك، ويلفت انتباهك للحاجات من أول وجديد، عشان تتوازن وتقتنع وما تغلطش، لكنك للأسف هتترنج، وهتغلط كثير قوي، وهتقع، وهتتجرح، ورجلك هتزلّ في تجارب فرعية كثير، هتفتكرها طوق نجاة في الأول، لكنها في الحقيقة طوق حوالين رقبته!

وكان هزيمتك أول مرة، بقت مبرر لاستمرار الهزيمة باقي عمرك! أو كأنها لعبة وكل اللي كان هيلتك حياة واحدة بس، ضيعتها بغباك!

الهزيمة في حب صادق، ممكن تبقى آخر مسمار في نعشك، حتى لو فضلت واقف على رجلك، بتضحك وتتكلم وتمثل، ورفضت تمضي شهادة الوفاة، اللي اسمك الثلاثي مكتوب في أول سطر فيها، وممكن تبقى بداية فوقانك وتحولك لإنسان أفضل وأكثر حقيقية، واللي بيحدد ده: نظرتك لنفسك وإذا ما كنت تستحق تعيش الحياة فعلا ولا لا تستحق أكثر من إنك تبقى مجرد سطر في قصة أحدهم!



بعد انتهاء العلاقات، خصوصًا لو كانت النهاية نيّة ومش مطبوخة، كويس، أو مؤلمة وجارحة وبتجيب دم، أو غير متوقعة وغير منصفة، طبيعي جدا تتمنى للطرف التاني إنه يتنيل على عينه وما يتوقفش! طبيعي جدا تتمنى له الفشل من بعدك وإن ربنا يخرب بيته، عشان يعرف قيمتك وأهميتك ويندم على الفرصة الكبيرة اللي ضيعها على نفسه!

إحنا مش ملايكة، ولا صوفيين متجردين، ولا من أولياء الله الصالحين، فطبيعي جدا تبقى دي مشاعرنا، وتبقى دي عتبه تفكيرنا الأولى ساعة الصدمة وفي عز الوجع، دون أن يعني هذا من قريب أو بعيد إننا أشرار ومصاصي دماء وبننتسلى بفقء أعين الناس وقت الفراغ! وحتى بمنطق ديني: الذنب لا يُحتسب إلا إذا وقع، أما التفكير فيه دون فعل فلا قيمة له، فإنك تتمنى له الشر، ما دام لم يتحول إلى فعل وسعي حقيقي لنقله إلى حيز التنفيذ، فليس شراً، وإنما مجرد تنفيس ومحاولة لنفث الكبت ووجع القلب والذكريات الزبالة، لإعادة التوازن النفسي وإخراج الصديد وطرح الفرص والإمكانيات على مائدة البحث. فما تشقش على نفسك، وتحس بالذنب وبالخطيئة لما الأفكار الشريرة تستفرد ببيك، وفي الوقت نفسه سييها، ما تدخلش في صراع معاها ولا تحاربها وتزق فيها، عشان ما تأكُده وجودها جواك، بعد شوية هتمشي لوحدها وهتدي الفرصة لإرادة الحياة جواك ترفع راسها وتنتشلك من كل المشاعر السلبية دي، وتوريك السكة الجديدة اللي لازم تمشي فيها.



أخطر العلاقات وأسوأها على الإطلاق، هي اللي بتعقب الانفصال، بيبقى الواحد عايز يعوّض خسائره بأقصى سرعة ممكنة، ويثبت لنفسه وللطرف الثاني إنه مش غلطان، وإنه لُقطة، وألف مين يتمناه، ويخليه يندم على يوم فراقه!

ودي المرحلة اللي بنلتهم فيها الأونطة بأريحية مطلقة، وعن طيب خاطر، ونصدق أي حد يقول لنا كلمتين حلوين، من غير ما نمرّهم على عقلنا خالص، أو نقف لحظة واحدة عشان نفكر ونحسب ونوازن

بين الخيارات ونشوف الإنَّة فين، بل وبنحارب الي بيحاولوا يلفتوا انتباهنا لى بنعمله في نفسنا، وممكن نخسرهم ونصنّفهم في خانة أعداء النجاح والحاقدين بكل سهولة، لمجرد إنهم بيقلوا كلمة حق! والصح إننا ناخذ هدنة معقولة عقب انفضاض أي علاقة، نقف على مسافة عادلة من كل حاجة وكل شخص، لحد ما نستوعب الأشياء، ونعرف راسنا من رجلينا، ونفهم ازاي وصلنا للنقطة دي، وازاي ما نعملش في نفسنا كده تاني، وما نحاولش نستنسخ الي فات في الي جاي، أو ندور على التجربة نفسها بحذافيرها مع شخص تاني، لأن ما حدش شبه حد.

الأخطاء والسقطات وسوء الحكم على الأشخاص والفشل في تأويل الحالات أمر طبيعي للغاية، وما حدش معصوم منه: الأذكياء والأغبياء، الي بيقطّعوا السمكة وديلها والى ما بيعرفوش يفكّوا الخط في العلاقات، حاجة كده زي الضريبة الي لازم تتدفع عشان تعدي، ودي مش مشكلة في حد ذاتها، المشكلة في عدم برمجة الخبرة السيئة في المخ، والاحتفاظ بيها عشان نضع مضاد حيوي ليها وتطعيم ما يخليهاش تخيل علينا تاني، وبالتالي السقوط في البئر نفسها كل شوية.. كل شوية.. كل شوية!

انتهاء العلاقات أحد أصعب الآلام في الحياة، وما بنقدرش نتجاوزه بين يوم وليلة، وأثره بيمتد لآخر العمر في حالات بعينها، لكن -على الجانب الآخر- الإنسان بطبعه طمّاع، ونسبة الحمورية في دمه لا يُستهان بيها الحمد لله، ويفضل يعمل نفس الحاجات كتير قوي وهو منتظر نتيجة مختلفة، ومهما ده ما حصلش، ما يقللش عناده

وغروره، كأنه في مهمة مقدسة لحبس نفسه في سجن الحزن والحيرة للأبد، ثم بكل وقاحة يقول: ليه يا رب ده بيحصل لي ده أنا بالذات؟! أقول لك ولا تزعلش؟!

ابدل كل ما تستطيع للحفاظ على علاقاتك، لكن لو انتهت غضب عنك، اقف، وفك إيدك، وسيب الحاجات تنتهي، واسمح لنفسك بالحزن، وما تعملش فيها سوبر مان، واشغل وقتك وابعد عن الحاجات اللي بتفكرك بيها واهتم بنفسك وغير أسلوب حياتك على قد ما تقدر ووسع دايرة معارفك والنشاطات اللي بتعملها، وواحدة واحدة، السم هيخرج من دمك، وهتقف على رجلك، وتبقى مستعد لعلاقة جديدة على نضافة، من غير ما تظلم نفسك ولا تظلم طرف تاني ملوش ذنب.

وتذكر أنه لا يوجد أي شخص لا يمكن تعويضه.

أي شخص.



اللي بيحب حد، يبقى في لاوعيه -ولو للحظة- رغبة دفينه غير معلنة إنه يسيبه ويلم الدور، عشان يتخلص من عبء العلاقة ومسؤولياتها وتبعاتها وتعقيداتها، ويستعيد حرته مرة ثانية ويعيش من غير وجع دماغ.

واللي شغال في شغلانة، مرتاح أو مش مرتاح، بشكل أو بآخر هتلاقيه في لحظة ما برضه، يفكر يسيبها، ويشتغل في حاجة بتاعته أكثر وتناسب إمكاناته وطموحاته بشكل أكثر تحديدا، أو يمكن ما يشتغلش خالص أصلا!

واللي متجوز، ومهما كانت قوة علاقته بالطرف الآخر، نفسه -في اللاوعي برضه- ينفصل ويتحرر ويبقى خفيف ويشوف الدنيا من منظور جديد.

الرغبات الدفينة دي، وتهويمات العقل الباطن، واللي ممكن تكون لحظية وعابرة، ونتاج تعب أو إرهاق أو خذلان أو إعادة تقييم أو تغيير في الشخصية بمرور الوقت، ممكن تتحكم فينا وفي تصرفاتنا من غير ما ناخذ بالنا، وتغير خريطة علاقتنا بنفسنا وبالآخرين.

فتلاقي المحبين بيهبشوا في بعض فجأة على سبب تافه، وتلاقي المتجوزين ممكن يوصلوا للطلاق بلا أي مبرر قوي ملموس، وتلاقي واحد صحي الصبح راح قدم استقالته ورجع قعد على القهوة بكل هدوء ودون أي خطط مستقبلية محددة!

عشان كده، لازم نتعود نسحب مشاكلنا ومخاوفنا ورغباتنا المكبوتة للنور، وناقشها، ونفتش وراها، ونعرف أسبابها، ونحاول نعالجها ونطمئنها ونوفر لها خروج آمن، اتقاء للمفاجآت وردود الفعل غير المبررة.

لازم نبقى صرحاء مع أنفسنا وعارفين حدودنا وإطارنا الأخلاقي ومنظومتنا القيمية ومساحات المغامرة في حياتنا ومواطن الضعف.

الإنسان كائن معقد جدا، ومفיש كتالوج موحد ينطبق عليه، وبقدر ذكائه فهو غبي، وبقدر شجاعته، فهو أحمق، وبقدر طبيته فهو شرير، والتعامل معاه لازم يكون على نفس القدر من التعقيد، والحيلة، والانتباه، عشان تبقى النتائج النهائية مرضية إلى حد ما، ومفיש فيها كوارث تطيح بمكتسباتنا اللي تعبنا فيها عمر كامل ومع ذلك ممكن تضيع في لحظة!



ابعدوا شويّة عن الي بتحبّوهم، ما تعرفوش كل حاجة عنهم، ما تتشاركوش في كل شيء، ما تخرجوش طول الوقت مع بعض، سيبوا مناطق رمادية صغيرة ما بينكم، مساحات شخصية مش مطروقة، أصدقاء مجهولين. الاكتشاف الكامل بوابة الزهد التام.



ومن قال إن "البعيد عن العين.. بعيد عن القلب"، جحش كبير، فالشوق تُسكنه -وَقْتِيًا- نظرة للمحبوب، فإن لم تتوافر، تكفّل القلب بنسخ المحبوب في كل ما يحيط بالعاشق: البشر والأثاث والسيارات والشوارع والمباني، حتى لم يعد يرى سواه أو يفكر في غيره، فيستفحل شوقه ويتعاطم وجّده، أكثر مما لو كان المحبوب أمامه، ملء السمع والبصر!



لما بنحب.. بنشوف الي بنحبهم ملايكة بجناحات، منزّهين عن الخطأ، وليهم حق في كل الي بيعملوه، وأي تصرف غبي بيصدر منهم، بتتسع صدورنا ليه وبنلاقي له 100 تفسير منطقي وبرنس في نفسه، ويمكن ده الي بيصعب الدنيا أكثر بعد الانفصال: إننا بنتخيل إننا خسرنا كائن سماوي مش هيتكرّر.

لكن لو قدرنا من الأوّل نحط كل واحد في حجمه الحقيقي -بما في ذلك أنفسنا- هنبقى أكثر قدرة على قيادة العلاقة لبر الأمان وتخطي العقبات من ناحية، ومن ناحية ثانية هنعرف نقرأ العلامات صح، وما نتخدعش، أو نطنّش مؤشر حيوي وخطير ذو دلالة مهمة في مسار العلاقة.

ولو ما حصلش نصيب هيكون عندنا من الوعي اللي يخلينا
نقفل الصفحة دي باحترام وإنسانية ودون إراقة الدماء وزرع الضغينة،
والاستعداد لفتح الصفحة التالية بسلاسة وأريحية.

الحب مش تسبيل وخروجات في ضوء القمر وعش العصفورة
يقضينا وسلانetro وماك، إنما بنيانً على شفا حفرة، مركبٌ ضيقٌ لا
يتسع سوى لفردين في خضم بحر عرمرم، ثقبٌ ضئيلٌ في جدار مُصمت
يوشك أن ينقضّ، ولا يقدر عليه سوى أولياء القلب الصالحين.



أسوأ ما في انتهاء قصة حب بين رجل وامرأة، أنهما لن يعودا
صديقين مرة أخرى!



دائمًا بنيجي على اللي بنحبهم، وبتجاوز معاهم كل الحدود، عشان
مطمّنين من ناحيتهم، وعارفين آخرهم، وواثقين في قدرتنا على مداواة
غضبهم منّا أو إحباطهم من تصرفاتنا، لكن مع الوقت بتختفي من
قدام عينا الفروق الجوهرية بين اللي يمكنهم احتمالها فعلا واللي لا
يمكن بأي حال من الأحوال التساهل معاه، لحد ما بنصحى في يوم
على حياتنا معاهم -حرفيا- مرمية في الشارع!

وساعاتها الحساب مش بيبقى على آخر موقف حصل بينا بس،
لكن على الفاتورة كلها بدون حد أقصى لرد الفعل!

يمكن بنعمل ده بغباء ومن غير قصد ولا تدبّر في العواقب، لأننا
في غاية الهاشنة والعوز، وطول الوقت محتاجين حد نسند عليه
وتتعرّى قصاده وإحنا مش مضطرين للتبرير أو إرهاق الذهن في إسباغ

المنطقية على تصرفاتنا في حضرته أو ادعاء الانصياع لمسلّمات المجتمع وشكلايات العادات والتقاليد، حد نكون معاه على طبيعتنا الحقيقية من غير أفنعة ولا حسابات المكسب والخسارة ولا تركيز في التفاصيل وتفصيل التفاصيل.

لكن المشكلة إننا وإحنا بنعمل كده، بننسى إن هو كمان محتاج مننا اللي محتاجينه منه!

الموضوع معقد للغاية، ومساحات الصح والغلط فيه مش محددة بقلم أحمر وقاطعة الثبوت والدلالة، ومفيش حد هنا شرير بشكل مُطلق ولا خير بشكل مطلق، وقدراتنا مش زي بعض، والفروق الفردية بينا أكبر من أن يتم حسابها وحصرها بسهولة، ومفيش -للأسف- كتالوج موحد للعلاقات يمكن الرجوع إليه للاسترشاد والتوعية، لكن فيه مبدأ عام وأساسي أعتقد لو حطّيناه قدامنا طول الوقت يمكن يكون دليل على السكة، وبداية لرحلة إعادة التوازن لعلاقتنا المهمة واللي فارقة معنا في الحياة: ما تحوجوش حبايكم لغيركم.



ما ينفعش تستجدي الحب. تمد إيدك كل يوم وتبص له بعيون مهزومة وتقول له: أنا بجري على قلب مكسور شوية حب لله، وتصمم تفضل في حياة شخص شايفك مجرد مرحلة، أو حلقة وصل بين تجربة فاتت وتجربة جاية، أو جسر ببعدي عليه للوصول لذاته، تاركا قلبك نهبا لكآبات الوحدة وشجون الانكسار، على أمل إنه يحس بيك في يوم، ويعوّضك أيام السهر والألم والدموع والخوف والرعب من يوم يجي وهو مش معاك، أو يوم يجي وإيده في إيد حد غيرك،

وإنت واقف مستخبي بعيد، بتبص له من ظهره، زي ما اتعودت
طول علاقتكم!

الحب زي الموت، قرار في اتجاه واحد، مفيش فيه مفاوضات، ولا
انتظار، ولا واسطة، ولا مجاملة، ولا جبران خواطر، ولا تغيير حيثيات
الحكم بعد صدور القرار.

يا موجود يا مش موجود.

وإنت عارف كويس قوي إن مفيش أمل، مفيش سكة تانية،
مفيش طرق خلفية ونوافذ متسابة مفتوحة عن طريق الخطأ، مفيش
معجزات، واعترافك أو عدم اعترافك بده، مش هيغير حاجة!

وعارف كمان إنك مش هتبتّل تستناه، وتشوف نفسك بتخلق
في حضنه، وتحكي عنه للسريير والستارة والموبايل والكتب والشجر
والبطاطس المحمرة وحنفية المطبخ! ولا هتبتّل تلجأ للسما وتدعي
يكون من نصيبك وإنت شرقان بالعياط، ولا هتبتّل كل يوم تتكوم
على سريرك لوحدك في عز الليل، تبص في السقف لحد الصبح، من
غير ما تدوق طعم النوم، وحكاياتك معاه بتتكرر قدامك، ذكرى ذكرى
ولقطة لقطة وكلمة كلمة، وقلبك بيرجف من الלהفة والخوف والألم
واللوعة والشوق والحنين والانتظار، وبتنبش بضوافرك وسنانك عن أي
حاجة ممكن تغيّر الوضع المستحيل.. وما بتلاقيش!

وعارف أكثر إن الدائرة الجهنمية اللي بلعتك دي عمرها ما
هتتكسر، إلا بانكسار قلبك نفسه مليون حته، وعدم صلاحيته مرة
أخرى للاستخدام الآدمي!



غياب الأحباب جسديًا بالموت، رغم قسوته وصعوبته، يقفل دائرة التخيل والاحتمالات عندك تمامًا، ويوقفك عند عتبة معينة ما بتتجاوزهاش أبدًا، وده اللي بيساعدك مع الوقت على التحمل وربما النسيان، لكن غيابهم بالفراق، بيوقفك في إشكالية أشبه بالرمال المتحركة، اللي كل ما قاومتها أكثر، غصت فيها أكثر: هو أنا ممكن أشوفه تاني؟ هو ممكن اللي بينا يرجع في يوم؟ هو أنا هكمل ازاي عادي كده من غيره؟ هو مين فينا اللي غلطان أصلاً... ما يقودنا في النهاية للاعتراف إن الموت -في أحيان كثيرة- بيكون أكثر رحمة من الفراق!

فما تسحلش حد معاك.

عايزه؟ حاي عليه، واغنيه، وما تحوجوش لغيرك، والضم حلمك في حلمه، وعيشوا يا أخي.

مش قدها؟ الزم مكانك، وما تموتوش وهو حي!

القلب مش معمل العلوم بتاع ثانوي، اللي كنا بننتهز فرصة انشغال المدرس لما ندخله ساعات، عشان نلعب ونجرب، ونحط حاجات فوق حاجات، يمكن بالصدفة تضرب معانا، ونوصل لاختراع يقلب موازين البشرية!



ما تحكمش على أي تصرف وإنّت جواّ العلاقة إنه حلو أو وحش، غير بعد ما توصل لعتبة فارقة ونهاية مُرضية.

لأن الكويس والهايل والجميل، لو انتهى بالفراق والخذلان والتخلي ووجع القلب، يبقى ما كانش زي ما إنت فاهم، كان لعب بقى أو

تقضية وقت أو تسلية أو مصيدة... أو... أو... لكنه قطعًا ما كانش صادق ولا حقيقي.

أما إذا انتهى لصالحك بأي طريقة ممكنة، فقول شعْر براحتك فيه، وباهي بحسن اختيارك زي ما إنت عايز.

إحنا بنفرح بأقل حاجة، وما بنصدّق نضحك ونبسط، لكن مش كل الناس زيينا، فيه ناس محترفة، بترمي لنا عَصْمَة عشان تاخذ قصادها جَمَل، وتفضل تمد حبل الأمل المزيف لحد ما يلفّ حوالين رقاينا ويخنقنا!

وفي الوقت اللي بنتصوّر فيه إننا خلاص وصلنا البرّ وعدّينا، بنكتشف فجأة إننا بقينا في عرض البحر خلاص، بدون سُترة نجاة ولا حتى تليفون حد نبكي معاه على الخط وإحنا بنغرق!!



وإحنا جوّه التجربة بنبقى مصدّقينها قوي، ومقتنعين بيها تمامًا، ومعتقدين إنها تجربة العمر كله، وبنفترض تلقائيا إن الطرف الثاني زيينا بالظبط، ويمكن أكثر، وما بنفوقش من وهمنا غير لما يصدر منه تصرف مش متوقعينه أو مخالف للنسق العام اللي راسمينه للحدوتة، فنقف ثانية، ونبص من برّه ذواتنا، فنكتشف المصيبة!

(زي ما بتبقى جوا أسانسير وتيجي عليك لحظة ما تبقاش عارف هو واقف ولا بيتحرك غير لما تبص على العتبة الثابتة برّه، لكن طول ما إنت جزء منه وجواه، هتفضل الأمور ملتبسة عليك!)

بنكتشف إننا في وادي وهو في وادي تاني، إحنا شايفينه أبد، وهو شايفنا مرحلة، معتقدين إنه دوا، وهو حمل جديد هياخد مكانه على رفوف القلب!

ودايما هتلاقي عنده مبرر عظيم، وحجة ومنطق ودنيا!

وسواء عاتبنا أو ما عاتبناش، انفجرنا ودبدبنا برجلينا وخربشناه بضوافرنا أو لفنا الصمت ونزل علينا سهم الله، فالنتيجة دايما واحدة: إحنا اتخدعنا، مشينا طريق جديد مش بيودي لأي حتة! لبسنا القلب توب حداد وهو لسه في عز شبابه! خسرنا وقت وعمر مش راجع تاني!

ومفيش حل!

طول ما قلبنا بينبض هنعجب، وطول ما إحنا ماشيين لوحدنا في سكة طويلة هنشتاق، وطول ما راسنا محتاج صدر يرتاح عليه، هيفضل يلف حواليه لحد ما يلاقيه!

وطول ما فيه بشر.. هيفضل فيه دناءة وغش وخداع وانتهازية ودموع!

وهيفضل فيه أم.

لكن الشطارة إنك تاطلع بالحسنة الوحيدة في القصة دي، وهي زيادة رصيدنا التراكمي من التجارب والخبرات، واللي المفروض ينعكس على جودة اختياراتنا بعد كده ولو جزئيا، وعشان ده يتحقق لازم نبقى واعيين لفسنا وولي حوالينا كويس قوي، ومتيقنين إننا نستاهل أفضل من اللي إحنا فيه، ومهما كان البهرج والمظهر خداع نقدر ننفذ من

خلاله ونبص على الروح، ونقرر إذا كنا نتعارف فنألف ولا هنتاكر
فنختلف.



ساعات بتبقى عايز حاجة معينة من اللي قدامك، وبالتالي أي شيء
هيقدمهولك، أيا كانت قيمته عنده مش هيشبعك!

بالظبط زي ما تكون جعان جدا، وقتها مش هتقدر تركز في جمال
الطبيعة الفتان أو تصغي لصوت العصافير على الشجر، رغم إن دي
حاجات جميلة طبعا في ذاتها، وفي أوقات تانية بترضيك وتخليك طائر،
بس إنت -ببساطة- دلوقتي عايز تاكل الأول، وتُرضي حاجتك، وبعدين
تبص حواليك بقى وتلتفت وتستمتع.

عشان كده، فيه توضيحات كبيرة بتتبذل ما بنحسش بيها، مش لأنها
قليلة، أو عديمة النفع، لكن لأننا مش محتاجينها في الوقت الحالي،
يعني أنا هيهمني بيايه إنك تتبرع لي بكليتك وأنا معنديش مشاكل في
الكلية وكل اللي عايزه أعمل نضارة؟ في الوقت ده النضارة أم 200 جنيه،
أهم عندي وأكثر قيمة من كليتك اللي ما تناقلش بالمال!

للسبب نفسه، قبل ما تكبل حد معروفيك، وجمالك، وتوضيحاتك،
شوف احتياجاته الأول، عشان ما تتصدمش في رد فعله من ناحية، واللي
عملته يروح هدر، ومن ناحية تانية: يمكن اللي هو محتاجة منك
دلوقتي، وهيمثل علامة فارقة في علاقتكم، يكون أبسط وأهون بكثير
من اللي إنت عمال تفكر فيه وتعد له وتحسب له وشايل همه.



بعد ما نكتشف خيانة حباينا وندالتهم، بتيجي علينا لحظات
نبقى عايزين نروح لهم -رغم انتهاء كل ما بينا- ونصرّخ في وشهم
إننا كشفناهم وما كناش مغفلين، لكن دي حيلة من العقل الباطن،
ظاهرها إننا عايزين نعرفهم قد إيه كنا واعيين قوي وما بيتضحكش
علينا بسهولة وفقسناهم، فيما الحقيقة إننا بنكون بنتلكك ونتعلّق
بخيط واهي إنهم لما يلاقونا كشفناهم.. يحسّوا على دمهم، ويبدأوا
من جديد معنا على نضافة، ويعتذروا عن اللي فات، ويحاولوا
بعوضونا وما يخونونا تاني!

لكن التجربة بتقول إن العلاقة الفاسدة لما تنتهي، لازم تنتهي، لا
عتاب بقى ولا ندم ولا ترتيب أوراق ولا هات جواباتي وخذ صورك
وتبرير مواقف وهم ما يتلم.

الي أعرفه: ضربة نافذة بسكين حامية في القلب تمامًا، وليحلّ
الظلام على الجميع. وما عدا ذلك: نحنة فارغة ودلع ومرقعة
ومياصة ومراهقة لا تليق بالحب وأهله ولا باحترامنا لنفسنا والله!



مشكلتنا إننا بنحاول نستنسخ التجارب اللي فاتت في كل علاقة
جديدة، عشان نعيش نفس الأحاسيس، ومُر بنفس الخبرات، ورافضين
نقتنع إن مفيش حد شبه حد ولا علاقة زي علاقة!

مع إن كل مرحلة وليها رونقها، وفيه تجارب حلاوتها في إنها انتهت
في الوقت المناسب، وسابت ذكرى لطيفة، ولو كانت استمرت لحد
دلوقتي، كانت دمرتنا.

دع من يمضي يمضي، ومن يفارق يفارق، سيب رجله، وفُك إيديك
من حوالين رقبته، وخليه يمر، الراحلون لا يملكون عناويننا الجديدة،
والموتق لا يعودون إلى أرض ابتلائهم، فعش الحياة - كما يقول صديقي
محترف السيارات- (نقلة ورا نقلة).



لو بحثنا لن نجد.
الحب كالموت يتخطفنا في موعد لا يُخلفه.



مَنْ أَحَبَّ لِسَبَبٍ، وتعلّق لغايةٍ، يُوشك حُبّه أن يزولَ بفوات
السببِ، وانقضاء الغاية، ومَنْ أَحَبَّ بلا سببٍ، زادته الأسبابُ كَلَفًا
وتعلّقًا ويقينا.



سلامًا لمن طرّق البابَ، فوجدَه مغلقًا، فعذرَ وأمهلَ وصبرَ وربّطَ
وأبى الانصرافَ، ومكثَ غيرَ بعيدٍ،
يتحَيّنُ فرصة، ويترصّدُ ثغرة، حتّى رأى نصفَ انفراجةٍ، فانتهزها،
وجازَ وعبرَ واخترقَ ومرّ إلى قلوبنا، فأناز ومنح وطبّط وأحيا وأعان
وعوّض واحتوى.



وأن ليس لمن أضع الطريق أن يسأل متى الوصول!



في علم التسويق يوجد مصطلح **positioning** ويعني وضع علامتك التجارية في التصنيف الملائم لها في السوق، لتخاطب جمهورك الذي تبحث عنه ويبحث عنك، فلا يصح أن تكون سلعتك كتباً مثلاً، وتقدم نفسك على أنك صانع حُلّي ثم تشكو أن أحداً لا يُعيرك انتباهاً! والأمر نفسه في العلاقات عموماً، لا بد أن تضع ما بينك وبين الطرف الآخر في مكانه الصحيح، وتختار له التوصيف الملائم والواقعي، وتضع إطاراً زمنياً للانتقال بين أطوار العلاقة مع ترك هامش للإخفاقات والمرونة في تغيير الوسائل والطرق للوصول للهدف النهائي، كي لا يفاجئك ما يحدث -أو ما لا يحدث- لكن مصيبتنا الكبرى وحمقنا الأفدح أن الـ **positioning** يبقى ضاربه السلك ومميل بنيلة من الأول أساساً!



البُعد ما يعينش إننا ما بقيناش مهتمين ببعض، ولا محتاجين نتظمن على بعض.

البُعد استجابة للقدر، للظروف، للغباء، لكنه ما بينزعش الإنسانية من القلب، ولا ييموت الذكريات الحلوة حتى لو عليها رُكام القسوة والتفاصيل، ولا ينسينا قد إيه كُنّا بني آدمين وحقيقيين فعلاً وإحنا مع بعض. ويمكن بالعكس: القُرب كان عامينا عن أحلى ما فينا، ولما بعدنا شُفناه، وحسينا باحتياجنا إليه، حتى لو ما عادش ينفع نبقى مع بعض تاني!



بعد قليلٍ، نبدأ في الاقتناع، أن الحبّ لم يكن -فقط- مسكة اليد في حضور قمرٍ عفيّ على الكورنيش، ولا القُبلة المختلّسة في ظلام السينما، ولا الحضن العاصر النازف حينًا بين سرايب "بيت الست وسيلة" في الحسين، ولا المكالمات الليلية الهائمة حتى الفجر على خلفية من شدة أم كلثوم "هل رأى الحب سُكاري مثلنا"، وإنما كذلك: القدرة على معرفة اللحظة المناسبة للصمت.. للكفّ عن كلّ شيء.. لجرجرة الأحلام والانسحاب بهدوء.. دون خسائر فادحة!



سلامًا للذين إذا مرّوا على القلب، طيّبوا جروحه، وأناروا مصابحه، وأحيوا شوارعه وطرقاته، وطرّدوا أشباح الراحلين والغادرين والخائفين والمرتعشين، وحوّلوا الخسارات مساحاتٍ لانتظار الفرص، والهزائم أقمارًا في ليل الشجن الطويل.



إنما المحبّون من إذا مدّوا أيديهم إلى نار الله الموقدة واحترقوا، لم يلوموا اللهب ولا الحرارة ولا مشعلها، لكن أنفسهم!



سلامًا للأشياء التي تنتهي حين تنتهي، العابرين دون صخب ولا بصمات أصابع على القلب، التاركين مساحاتٍ لالتقاط الأنفاس، المتحققين بالغياب، الواصلين بالانقطاع، الباقين هناك، في مكان نجهله ويجهلونه، وقد لا يمكننا الوصول إليه أبدًا.. لكنه يبقى.. وييقون.. رهن إيماءة.



يمكن مش مكتوب لنا نلعب أدوار البطولة في حياة بعض، ونفضل في الضل، لكن ساعات الضل سيكون أصدق وأكثر قدرة على التأثير.



وَجُلُّ ما تمنيتُ.. أن تكوني لي حالًا لا حالة.



كانت أمي تقول لي بابتسامة حانية (ربنا يستر قلبك).

فأقبلُ يدها ورأسها وأمضي، دون أن أفهم يقينًا ما تقصده، حتى جرتُ عليَّ أحوال الدنيا، وفهمتُ أنها أعظم دعوة في الوجود!

فستر القلب أن يفتح الله لك براحًا في كونه، فيرزقك محبوبًا يبادلك المشاعر نفسها، دون منٍّ ولا إحسانٍ ولا مباحاةٍ ولا طمعٍ في قضاء حاجةٍ ولا انتظارٍ مقابلٍ، يُعشِّقُ روحك في روحه، ويكنُّ قلبك في قلبه، فيكون على ضعفه أمينًا، ولسره حفيظًا، ولكسره جابرًا، ولتقصيره مُعينًا، ولهله مسكنًا، ولنزواته ناصحًا، ولجنونه ساترًا، ولزلزلاته أويًا، ولفتوره طيبًا، فإذا كلاكما مُكتملٌ بصاحبه، مُستغنٍ عمَّن سواه، مؤتنسٌ بحضوره، مُكتفٍ بتجليه، فلا تقتحمكما عينٌ، ولا يذكركما لسانٌ، ولا تجري لكما سيرةٌ، ولا تنالكما مُخيِّلةٌ، ولا يرقى إليكما ظنٌّ، وذلك عينُ الستر والتخفي!

فله دَرُكٌ يا أمي!

